

Letšatsi la go Bala ka



★ go Hlaboša Lentšu la Lefase




le Nal'ibali

Dikanegelo di na le maatla! *Motsotso wa mafelelo*, e ngwadilwe ke mongwadi wa go thopa sefoka, Zukiswa Wanner, gomme ya swantšhwa ke Rico yo e lego radikhathune wa go tuma Afrika Borwa. E balele bana bao o nago le bona bophelong bja gago ka Letšatši la go Bala ka go Hlaboša Lentšu la Lefase, 1 Febereware 2018.



Mešongwana ye 5 ya Letšatši la go Bala ka go Hlaboša Lentšu la Lefase

1. Balela bana ba gago le ba bangwe kanegelo ya, *Motsotso wa mafelelo*, matlakaleng a 2 le 3. Itlwaetše go e bala ka go hlaboša lentšu ga mmalwa pele o e balela bana gomme o gopole go tšweletša tlhagišo ye ntši ya lentšu ge o bala.
2. Pele o bala kanegelo, botšiša bana ba gago ge e ba nkile ba bapala kgwele ya maoto, goba nkile ba ya go bogela kgwele ya maoto lepatlelong goba nkile ba e bogela thelebišeneng. E re ba abelane maitemogelo a bona le wena.
3. Morago ga go bala kanegelo, hlohletša bana ba gago go e hlatholla ka go thala goba go penta seswantšho sa karolo ye ba e ratago kanegelong.
4. Beakanya Meso-ya-Kopana-le-Kanegelo ka Letšatši la go Bala ka go Hlaboša lentšu la Lefase goba mafelelong a beke. Laletša bana gore ba tle le batswadi ba bona. Ka moka ba tsebiše dipuku tše o tsebago gore di na le dikanegelo tša botse tša go balwa ka go hlaboša lentšu ka go ba balela tšona.
5. Itereleng diphousetara tša Letšatši la go Bala ka go Hlaboša Lentšu la Lefase la 2018 go dira temošo ka go letšatši le. Wena le bana ba gago ripang ditlhaka le diswantšho dimakasineng le dikuranteng, thalang diswantšho, ngwalang mantšu le mafoko a lena, gomme le diriše le weposaete ya Nal'ibali (eya go "Story supplies" go www.nalibali.org). Dirang diselokene tša lena goba le diriše tša rena – Abelana ka kanegelo lehono!



Mehola ye 8 ya go bala ka go hlaboša lentšu

Go balela bana ba gago o hlaboša lentšu:

- go ba bontšha gore o bona dipuku le go bala go le bohlokwa.
- go le fa dilo tšeo le ka bolelago ka tšona ge le le mmogo.
- go aga tswalano magareng ga lena.
- go ba thuša go itemogela go bala bjalo ka mošongwana wa go kgotsofatša.
- go ba hlohletša go ithuta go bala ka bobona, gomme ba tšwele pele ka go bala.
- go ba bontšha gore re bala bjang le gore dipuku di šoma bjang.
- go ba dira gore ba ipshine ka dikanegelo tša go feta bokgoni bja bona bja go bala gabjale.
- go hlabolla tlhlotlontšu ya bona le mabokgoni a polelo.



Ka mo o ka tšeago karolo

Eya go www.nalibali.org goba www.nalibali.mobi go ngwadiša lapa la gago, sehlopha sa go bala goba sekolo gomme o thuše go dira gore tiragalo ye e be Letšatši la go Bala ka go Hlaboša Lentšu la Lefase le legologolo Afrika Borwa!

Motsotso wa mafelelo

Kanegelo ka Zukiswa Wanner

Diswantšho ka Rico

Phetolelo ka Mpho Masipa

"Lehono ke tla nweša dino tše pedi, Tate," a realo Neo a apara dieta tša gagwe tša kgwele ya maoto.

"Gomme ke tla thuša ka go oketša ka dino tše tharo, Malome," a realo Priya yo a fetšago go fihla ntlong ya gabo Neo le moratho wa gagwe wa mošemane, Rahul. Rahul o be a swere vuvuzela ya gagwe ye hubedu ya go kganya.


Tatago Neo o ile a sega. "Agaa, gona ke tlo reta gahlano!"

"Le nna, Malome! Nka reta le nna?" gwa botšiša Rahul.

"Ee, mošemane wa ka," a realo tatago Neo a thuša Mbali go apara dieta. "Bjale a reyeng!"

Ba tsene ka sefatanageng ka moka ga bona. Neo o dutše ka pele. O dutše ka pele gantši. O be a na le nnete ya gore ge tatagwe a tla mo dumelela, ge maoto a gagwe a le a matelele, o tlo kgona go otlela sefatanaga. Go be go bonala go le bonolo. Rahul le Priya ba dutše ka morago ka mathoko a Mbali. Ba ile ba mo tsikiditla gomme a sega.

Ba ile ba fihla lepatlelong ka pela. Ba fihlilele ka nako ye Priya le Neo ba swanetšego go tutetša mmele le maloko a Maqhawe Football Club. Lehono ba be ba bapala le Diamond Football Club.



"Le gopole go kgonthiša gore le fokotša go phadima ga Diamond, gore ka morago ga papadi ba fetolele leina la sehlopha go Coal Football Club," a realo mohlalhi.

Gwa fihla nako ya gore babapadi ba kitimele ka lepatlelong. Malokwane a letša nakana ya gagwe gomme papadi ya thoma.

Ba thomile ka go nanya, efela ba oketša matšato. Go be go na le lešata le legolo ge ba malapa a bana ba dihlopha tše pedi ba reta. Kgwele e tlo ba ka thoko ye go nwešago nakwana, gomme ge e bonala e ke e tlo ya ka seripeng se sengwe, yo mongwe wa babapadi o tlo tšea kgwele! Papadi e sepetšwe ka tsela yeo go fihlela gare ga nako ya papadi.



"Ke tenegile! Le tshepišitše go nweša dino," Rahul a realo go Neo le Priya ge ba etla ka mathoko a lepatlelo.


"Ee. Mbali o nyaka dikgwele, Mbali o nyaka dikgwele," gwa boeletša Mbali. "Mbali o swere ke boroko," a realo a edimola. Neo le Priya ba sega ba ya go maloko a sehlopha sa bona.



Abelana ka kanegelo lehono!

Nakana e letše gomme babapadi ba kitimela lepatlelong go bapala seripa sa bobedi. Papadi ya tšwela pele go swana le ya seripa sa pele ... go fihlela ge go šetše motsotso wa mafelelo!

Neo o be a na le kgwele. O ile a lelea go bona ge eba go na le leloko la Diamond kgauswi le yena. Aowa, o be a le tee. O kitimetše pele a tiribola kgwele. Gateete, gwa tšwelela sebakadi sa Diamond. Neo o mo lebeletše thwii ka mahlong gomme a raga kgwele ya feta gare ga maoto a sebakadi se sengwe. Babogedi ba hlaba lešata ka lethabo.



Sebakadi se sengwe sa Diamond sa batamela Neo go mo tšeyela kgwele. Ka pejana, Neo a ragela kgwele go Priya.

Bohle ba swere moya ge Priya a tšea kgwele gomme a e raga kudu ka leoto la ngele. **LADUMA!** Moswaradino wa Taamane ga se a bona kgwele ge e etla! Priya o nwešitše.



Pele ga motsotswana. O rile ge a retologa gore a keteke nno malokwane a letša nakana ya mafelelo! Maqhawe e thopile papadi!

Neo o thabile kudu a kitimela Priya gomme a mo kuka!



Bobedi bja bona ba kitimela maloko a sehlopha le mohlahlhi ka thoko ga lepatlelo gomme ba tepa. Gomme Priya le Neo ba kitimela go tatago Neo. Rahul o be a letša vuvuzela ya gagwe kudu.

"Wo ke mošomo wa go swanelwa ke asekherimo, Priya le Neo," a realo tatago Neo. "Bagale ba rena ba babedi ba tlo e thabela?"

"Ee! Re rata asekherimo," Mbali a ba arabela. Ka moka ba sega.

Neo a kuka Mbali gomme ba ya go reka asekherimo. Ga se a nweša dino tše pedi tše a bego a nyaka go di nweša, efela o thušitše mogwera wa gagwe wa potego go nweša nno ya go thopa papadi! Gomme Priya? O be a thabile ka gobane e be e le nno ya gagwe ya mathomo go Maqhawe. Modumo wa vuvuzela ya Rahul o be o kare mmino wa bose wa go bapalelwa yena mong.





Dira petšhe!

1. Ripa godimo ga mothalo wa maronthodi a mahubedu go ntšha petšhe.
2. Khalara seswantšho.
3. Ripa sediko sa bogolo bja go lekana le bja petšhe khapoteng ye sese, mohlala, lepokisi la diserele.
4. Kgomaretša petšhe khapotong ka sekgomaretši.
5. Diriša selotheipi goba masking theipe go kgomaretša phini ya polokego ka morago ga petšhe. Goba dira lešoba kua godimo o be o bofelele wulu goba thapo gore o kgone go e apara molaleng wa gago.
6. Ipshine ka go apara petšhe ya gago ge o bala le ge o theeletša dikanegelo ka Letšatši la go Bala ka go Hlaboša Lentšu la Lefase.

Re romele diswantšho tša bana ba gago le dipetšhe tša bona tša Letšatši la go Bala ka go Hlaboša lentšu la Lefase. Di emeilele go info@nalibali.org goba o abelane ka tšona letlakaleng la rena la Facebook!

Ka ga Nal'ibali

Nal'ibali (e ra gore "kanegelo ke ye" ka seXhosa) ke lesolo la bosesetšhaba la go balela-boipshino. E nyaka go utulla le go bjala setšo sa go bala Afrika Borwa ka bophara, gore go bala, go ngwala le go abelana dikanegelo – ka dipolelo ka moka tša Afrika Borwa – e be karolo ya bophelo bja ka mehla.



Bana ba go dikologa ke dikgatišo le go kwa dikanegelo tše dibotse ka dipolelo tše ba di kwešišago, ba rata go tseba, ba ba le boitshepho le tlhohloletšo ya go ithuta. E ka ba babadi, gape ba ka

šoma botse sekolong ka dithuto ka moka. Dikanegelo di hlabolla tlotlontšu, di tliša kgopolo le go hlokomela megopolo ya bana.

E sale go tloga ka 2012, Nal'ibali e šomile le ditšhaba tša dinaga tša go fapanafapana, le badirišanimmogo go tša kgwebo go kgonthiša gore ngwana o mongwe le o mongwe wa Afrika Borwa o ba le menyetla ya go ba le lerato la dipuku le dikanegelo. Badirišanemmogo bao re thomilego le bona ba akaretša: DG Murry Trust, PRAESA (Project for the Study of Alternative Education in South Africa) le Tiso Blackstar (e be e bitšwa, Times Media). Ka kwalakwatšo, tlhahlo le didirišwa tša go bala tša boleng bja godimo, Nal'ibali e thuša go hlokomela setšhaba sa babadi.

Nal'ibali e fa go go hlohleletša le go go thekga. **Ikgokaganye le rena** ka go lletša lefelo la rena la megala go **02 11 80 40 80**, goba ka ye nngwe ya ditsela tše: